

# Manmeri i witnisim Jisas trutru bai ol i kisim hevi.

---

Moning.

Long ples yumi ken i lukim ol bikman bilong sampela lotu na ol i jelas long narapela man i autim tok na ol manmeri i harim na bihainim tok bilong em. Na dispela narapela man i autim tok, em i stap gutpela man na em i autim tok bilong God stret, tasol ol bikman bilong lotu ol i jelas long em, na daunim em, na sutim giaman tok long em, na kamapim ol giaman stori bilong daunim gutpela nem bilong em. Ol i tretim em, na sampela taim ol i ken i paitim em, na wanwan taim ol i ken i kilim em i dai. Jelas na belhat na hetim bilong ol i antap tru.

Na dispela i no nupela samting. Lukim **Aposel 5:17-32**....

<sup>17</sup> Tasol namba wan hetpris na ol man i stap wantaim em, em ol man bilong lain Sadyusi, ol i jelas nogut tru, <sup>18</sup> na ol i arestim ol aposel na putim ol long kalabus. <sup>19</sup> Tasol, long nait wanpela ensel bilong BIKPELA i opim dua bilong kalabus na i kisim ol i kam autsait, na em i tok, <sup>20</sup> “Yupela go na sanap insait long tempel, na yupela autim tok long ol manmeri long olgeta samting bilong nupela laip.” <sup>21</sup> Ol i harim pinis, na long moning taim tru ol i go insait long tempel na autim tok.

Orait, namba wan hetpris na ol man i stap wantaim em, ol i singautim ol kaunsil na olgeta hetman bilong Israel na ol i bung i stap. Na ol i salim tok long haus kalabus bilong kisim ol aposel i kam. <sup>22</sup> Ol sikuriti i go long haus kalabus, tasol ol aposel i no stap, na ol i go bek na ol i tok olsem, <sup>23</sup> “Mipela i lukim dua bilong haus kalabus i lok i stap, na ol sikuriti i was long dua. Tasol taim mipela i opim dua ol man i no stap.” <sup>24</sup> Taim bosman bilong ol sikuriti bilong tempel na ol hetpris i harim dispela toktok, ol i tanim het na tingting planti olsem, “Wanem samting bai i kamap nau?” <sup>25</sup> Na wanpela man i kam na i tokim ol, “Harim, ol dispela man yupela i putim long kalabus, ol i sanap insait long tempel na skulim ol manmeri.” <sup>26</sup> Na bosman bilong ol sikuriti bilong tempel wantaim ol sikuriti ol i go na kisim ol aposel i kam. Na ol i no yusim fos tumas, long wanem, ol i pret long ol manmeri i stonim ol.

<sup>27</sup> Na ol i kisim ol aposel i kam na sanapim ol long kaunsil. Na namba wan hetpris i tokim ol olsem, <sup>28</sup> “Mipela i bin tambuim yupela long autim tok long nem bilong dispela man, tasol yupela i bin pulapim ol Jerusalem long tisim bilong yupela, na yupela i makim mipela i as bilong dispela man i dai.” <sup>29</sup> Na Pita wantaim ol aposel i bekim tok olsem, “Mipela mas bihainim tok bilong God tasol. Mipela no ken i bihainim tok bilong ol man. <sup>30</sup> God bilong ol tumbuna papa bilong mipela i kirapim na salim Jisas i kam, tasol yupela i hangamapim Em long diwai na kilim Em i dai. <sup>31</sup> God i litimapim Em na putim Em long han sut bilong Em bilong soim olsem Em i Hetman na Man bilong Sevim manmeri, bai Em i givim tanim bel long ol Israel na fogivim sin bilong ol. <sup>32</sup> Na mipela i witnisim ol dispela samting, na Holi Spirit tu Em i witnis, na God i bin givim Holi Spirit long ol manmeri i bihainim tok bilong Em.

Nambawan hetpris na ol Sadyusi lotu man, *ol i no mekim gutpela pasin*. Ol i bikman na ol i lidaman na saveman bilong lotu bilong ol, na ol i tingim olsem ol aposel i rong, tasol ol i no opim Tok bilong God na yusim Tok bilong God bilong soim olsem ol aposel i rong. Nogat. Ol i tingim olsem God i pas wantaim ol na God i no pas long ol aposel, tasol ol i no yusim Tok bilong God bilong soim olsem, God i pas wantaim ol na God i no pas wantaim ol aposel. Nogat. Ol i jelas tasol na ol i bihainim pasin bilong ol manmeri nogut bilong dispela graun na ol i yusim bikman pawa bilong ol, ol i yusim fos bilong ol, bilong arestim ol aposel na tromoi ol long kalabus.

Ol i tromoi ol aposel long kalabus na bihain ol i paitim na solapim ol (lukim Aposel 5:40). Ol nambawan hetpris na ol Sadyusi lotu man, ol i singautim ol kaunsil (em ol mejistret bilong ol Juda) na ol i singautim olgeta hetman bilong Israel na ol i kotim ol aposel. Na taim ol i harim tok bilong ol aposel, orait ol i belhat nogut tru na *ol i laik kilim i dai* ol aposel. Belhat bilong ol i antap na ol i laik paitim na solapim na pinisim laip bilong ol aposel. Jelas na belhat na hetim bilong ol i antap tru.

Dispela stori i kliaim tingting bilong yumi long 2-pela samting....

## 1. Yumi i witnisim Jisas trutru, bai yumi kisim hevi.

Sapos yumi bilipim na trastim feitul wok bilong Jisas na yumi bihainim Em, na yumi witnisim Jisas na yumi tok klia olsem, *feitul wok bilong Jisas em i rot God i makim bilong kisim bek sinmanmeri na i no gat narapela rot*, orait bai yumi kisim hevi long han bilong bikman bilong ol sampela lotu. Em ol man i makim ol narapela rot olsem baptais, na Sabat, na lotu pasin, na gutpela pasin, na misin pasin, na ol narapela samting olsem, na ol i tok olsem ol dispela samting em i rot God i makim bilong kisim bek sinmanmeri. Baibel em i stori long ol dispela samting, tasol Baibel *em i no makim* ol dispela samting em i rot bilong God i kisim bek sinmanmeri. Nogat tru. Baibel, tok bilong God yet, i makim Jisas na i makim feitul wok bilong Jisas tasol em i rot bilong God i fogivim na kisim bek sinmanmeri.

Em olsem na, ol bikman bilong ol sampela lotu ol i pas long ol narapela samting, ol i pas long ol narapela rot, na ol i les long yumi tok klia olsem, feitul wok bilong Jisas tasol em i rot na i no gat narapela rot.

Ol dispela manmeri ol i no save opim Baibel na yusim Baibel long rait wei na ol i bekim tok bilong yumi. Nogat. Ol bai belhat na jelas na sutim tok nating na mekim giaman tok bilong daunim gutpela nem na gutpela pasin bilong yumi. Na ol bai pretim ol manmeri, bai ol i no ken i harim tok bilong feitul wok bilong Jisas, na ol bai semim ol bilong holim ol i stap long tisim bilong ol.

## 2. Wok bilong Jisas bilong singautim na kisim ol lain bilong Em i kam i no inap lus.

BIKPELA Jisas i friim ol aposel long sel bilong kalabus, *bai* ol i autim tok long ol manmeri long olgeta samting bilong nupela laip. Ol i witnisim Jisas na witnisim feitul wok bilong Em. Long tempel na long ai bilong ol bikpela man bilong lotu Juda (Israel) ol i witnisim Jisas. *Long dispela rot* BIKPELA Jisas i bin *pulimapim* ol Jerusalem long tok bilong feitul wok bilong Jisas. Na *long dispela tok* BIKPELA Jisas i singautim ol manmeri bilong Em i kam long Em yet.

Nambawan hetpris na ol Sadyusi lotu man ol i jelas na belhat na mekim pasin nogut na yusim fos bilong dispela graun, tasol dispela *i no stopim* wok bilong Jisas bilong singautim ol sinmanmeri i kam na ol i bilipim na trastim na bihainim Em, na ol i kisim fogivim na laip long feitul wok bilong Em, na ol i stap femili bilong Em. Ol bikman bilong lotu ol i ken i yusim ol fos bilong ol, tasol *ol i no inap stopim* Jisas.

Jisas Em i pas olgeta long wok bilong Em. Ol manmeri Jisas i lusim laip bilong Em bilong fogivim na kisim bek, orait Em i wok long singautim ol na kisim ol i kam long Em yet. Em i no inap feil long dispela wok bilong Em. Ol bai harim singaut bilong Jisas (taim ol manmeri bilong Jisas i witnisim Jisas trutru), na ol bai tanim bel na bilipim na trastim na lavim na bihainim Jisas tasol, na bihain ol bai sindaun wantaim Jisas long nupela heven na nupela graun.

Glenn.

Sapos yu laik save moa long dispela tok, orait yu lukim Aposel 5:17-32 long *Autim Tok* long [www.pngbiblesources.org](http://www.pngbiblesources.org).